



VERSCHNUUFFER

www.verschnuuffer.ch

Fasnacht 2010

SUBVENZIONSSCHLAMPE

Go Fasnacht mache muess sich loone
fir das gits nämmlig Subvenzioone.
Der Plausch ellai isch längscht nimm gnue
sunscht mache mir dä Laade zue!

An unserer Fasnacht gits vyyl z hoole,
nid numme Stimmig, nai au Koole!
Drum mache mir s glyych wie die stuuere
und arme, hungerlyyder Buure:
Wenn steggd e Buur so rächt im Sumpf,
denn schreyt är no der Widmer-Schlumpf.
Als Bündnere isch si zer Stell,
falls ebber Subvenzioone well!

Vyyl Subvenzioon bruucht au d Kultur
sunscht blybt sy langwyylig und stuur.
Das Schauspiil, wo d Regierig git,
das längt de maischte Lyt halt nid.

Denn d Blocher Show isch längscht am Ändi
- e jeede frait sich iber d Wändi -
und au der Couchpää het en zupft.
Der Leuebärger luegt verschnupft,
well jeede-n-ihm ans Bai wott saiche.
Nur laider duet s kain richtig braiche...

Trotz diggem Loon gfallts nuur em Guy
in Basel ai Joor Stapi z syy.
Wär sunscht dert schafft hän mir kai Aanig,
das steggd dängg als no in der Planig.
S isch d Politik zer Zyt zem Gääne
und Resultat kasch nid erwääne.
Vo Libye bis Kopehaage
goot s unserem Land so rächt an Graage.

Ganz bsunders in de USA,
dert wott me vo-n-ys Zaschter ha.
Zem d UBS nid loo verlumpe
muess d Schwyz ganz zünftig Gäld dryypumpe.
Als Züggerli isch oobedryy
au s Bangg-Ghaimnis grad mit derbyy.
Hit wisse mir – isch s nid zem Lache? –
es wär verbotte gsii das z mache...

Fir Subvenzioone mehr ins Gwicht
fallt glaar die ganzi Fasnachtsgschicht:
S het s Comité die wichtig Rolle
- fir das wänn mir Tribut ihm zolle –
mit Zuestipf Clique z unterstizte,
im Jargon: Finanziell z besprizte.
Mit Huet und Mantel wird drum checked
eb au gnue Witz im Sujet steggt.
Es wärde Lyt und Zeedel zellt,
am Schluss wird denn e Cheque ussgstellt.

Fir glaine Uffwand groosse Loon,
so wänn mir an die Subvenzioon.
Als Schlampe gstatte mir der Zug.
De mainsch eso sygg das Betrug,
mir sygge doch voll krass dernäabe?
Mir kenne mit däm sehr guet lääbe!
Drum: Ab uff d Gass goot s jetzt als Schlampe,
mir fille-n-ys derbyy no d Lampe.

S isch s Schlampe Doosyy ganz nit easy,
und wottscht mit vollem Dampf derbyy syy
muesch regelmässig kontrolliere
dass kaini Kaim duesch transferiere.
Muesch s Outfit laufend uffpoliere
sunscht wott Dir kaine go hofiere.
Obwool me gärn Dy Gsellschaft griesst,
wirsch Du am Daag nur sälte griesst...

So wänn mir jetzt go lobbyiere,
und d Fasnachtsszene go verfiere.
Vo aim Verain zem andere
geen mir fir Gäld go wandere.
De griegsch ys grad als ganzes Pagg,
glyy klingelet denn s Gäld im Sagg.

Wott s Comité nyt uuserugge,
no mien mir ys firs Gäld halt bugge...

Au unseri Latärne kaasch vom Mäntig z'Nacht bis am Mittwuch am Morge
uff em Minschterplatz bestune.
